

Timóteo Paulõ ha dukũ kene bumanikiaki

1 TIMÓTEO

Paulõ Timóteokiri xinānikiaki, na hātcharā

1 ¹Ea ẽ Paulorā, Deus nukũ mekenika inũ Jesus Cristo hawẽ yubakaniwẽ nũ hiweshanai nũ manaitũ Jesus Cristõ kuxipaya ea washũ ea yununibuki. ²Timóteoõ, ẽ mia kene bumai úrawe, ẽ mia Jesus Cristo ikũwāmaniwẽ taea mĩ ẽ bake kayabi keskakirā. Nukũ Epa Deus inũ nukũ Shanẽ Ibu Jesus Cristo miwẽ nuikĩ hau mia unānuma hiwemakĩ pewakĩ duawapakekubainũbũwẽ.

Yusĩa peparā, txakabube husitimakiaki, na hātcharā

³Macedõnia mai pakea anu kakĩ Éfeso anushũ mĩ hatu pewakĩ mĩ hatu merabewayunũ ẽ mia baxibiranima keska habias ẽ mia ana yunuaii. Tsuabũra ha hatũ yusinābũ hatũ xinā meribis hau hatu yusĩtxakayamanũbũ hatu nemakĩ pewawe. ⁴Tsuabũra hatũ shenipabu hiwenibu tanakubainaibu inũ hatũ shenipabũ beya hawẽrua keska hatu yusĩ txakaibu hau nĩkayamanũbũwẽ, ha miyuirā, hamēkirā. Haska yuimisburye hāttxanamei hau hamēyamanũbũwẽ. Haska Deusũ abuai hawa hatu amakĩ merabewatirubumaki. Hafia Jesus Cristo ikũwākĩ besti haska Deus yubakani abukĩ ikũwaĩ besti mā hiwetirubuki.

⁵Na haskakiri xinākĩ ẽ mia yunuairā, tsuabura hatũ huĩti detsisma pepawẽ xinākĩ dakeama Jesus Cristo ikũ kayabi waibu hau hatuwẽ nui nũ habube abunamekubainũbũ haskabu besti ikũwaĩbu txanima hatu yusĩkubaĩwẽ. ⁶Haska tibi besti yui ha iki inũ hamẽ hāttxa txakabu txibaĩ yusĩa pepa txibāma kanekanikiki, hatũ xinā husitā benuirā. ⁷Haburā, yusĩa kayabi unāmabia Moisés keneniwẽ yusinānāpaikĩ hatũmebi yuibiai habũ ibubis nĩka pewama inũ yusĩ pewai keska xinaĩ: “È pe hatu yusĩaiĩ”, ikĩ yuimisburye.

⁸Haska Deusū xinākī Moisés kenemanirā, tsuabūra haska hawē xinā txibākī nū akairā, haska pe nū unākanaii. ⁹Hirabibū xinānākāwē, haska nemati tibi yununi inū yunumisbu hayarā. Haska tibi kenekinā, pepabukiri tanakī akabumaki. Hakia eskawē taeshū anibu keyuismaki, hatū shanē ibu nīkabiakī hawē hātxa txibaīsbuma inū, txakabu tibi akī Deus sinatamamisbu inū, Deuski kashekī hawē kēwātiki meseisbuma inū, hawē epa kasmai hawē ewa haki pubēkī tenāibu inū, yura betsaki sinatakī tenāmisbu inū, ¹⁰txutabaūmisbu inū, huni dabe txutanamemisbu inū, aību dabe txutanameaibu inū, yura betsabu yumetsushū hawē pei bikatsi dayaru wakī ināmisbu inū, txani txakamisbu inū, hamē uīyamabia yura betsaki yubakatā paranamisburā, haskabunaki, haska habū yusīa kayabi txibaīsbumarā. ¹¹Na nemati tibi hayawē Deusū kaka pepa hawē bakekiri Deus duapahairatū ea yusītā haska ē txanikūkaunū ea yununiki.

Paulowē nuikī Deusū katunikiaki, na hātstarā

¹²Nukū Shanē Ibu Jesus Cristō ekiri pe xinākī ē txītūtiruma xinākī ea duawakī hawē daya ea yununiwē taeshū txanima hatū ea kuxipa wa ē kēwākubainaii. ¹³Ha dukunā, Jesus Cristokiri txakabu yui haki shetxakakī ha ikūwaību danākī ē hatu itxakawayuniki. Haskati dabanē Jesus Cristo ē ikūwāriama haska ē xinaī inū haska ē akubainai Deus ē benimawai dabanē ē ibiaya ha ē kaneaiwē taea Deus ewē nuitxakayamaniki. ¹⁴Nukū Yavé Deus ha besti nuikipahairakī ea duawatxakayamakī hawē xināwē ē xinā ea betsa wamatā Jesus Cristo ē itxakawabiaya ha ikūwaībuwē ea hatuwē nuitiwaniki, Jesus Cristowē taeshunā.

¹⁵Na haskarā, txanima kayabiki, tsuabūra ikūwātiruburā. Ikūki Jesus Cristo mai anu tashnirā, txakabu wamisbu hau Deusū hatu kupiyamashanū hatū txakabu buatā hatu mekēnū ika huniki. Hamē eānā, txakabu wakī yura dasibibu ē binuhairaniki. ¹⁶Ea ē haskabiakē Deus ewē dabanā ikī ea kupikatsi ikama hau Jesus Cristo ewē nuikī ea merabewakī hī hī ikī hawaira xinābaūs aismarā, ea uīmani haska tsuabūra ea xinākī ewē taeshū habūri ea uīkī Jesus Cristo ikūwākī hiwea kayabi bishākanikiki. ¹⁷Hanua Deus nū uītirimabia ha bestitū nuku mekei shanē ibuhairakūkaini niti ikama hiwemistū dasibi damiwani heneama hau dasibibū kēwākubainūbūwē. Haskakirā.

¹⁸⁻¹⁹Timóteoō, ebetā Jesus Cristo dayashuni mī ē bake keskaki. Ea nīkawe. Jesus Cristo ikūwaī haki dakeama txakabu nemakī txanima hātxa mī hatu yusīpakēnū Deusū hatu yunua Jesus Cristo ikūwaību yusīnā mekenikabū mia katunibuki. Habiaskari xinākī eāri ē mia yunuaii, mī kaneama ishanai unaīnā. Hakia yura betsabu hatiritū Jesus Cristo ikūwākī taewabianishū txakabu metā ma txītuābuki, hanushū

kupishanai anu buirã. ²⁰Ha inũ, Himeneu inũ Alexandrẽ habiaskari hatũ hiweawẽ hatũ yusã kanekĩ yusĩtxakaibu hau ha dabe ikũwaĩbube ana itxayamanũbũ ã hatu nemaimaki. Habũ xinaĩ keska Satanásã hau hatu amanũ ã hatu haska nemaimaki, ha Deuskiri txakabu yuiaibu ha ibubis keneaubũ Deusũ hatũ xinã betsa watiru hau unãshanũbunã.

Deusbe hãtxatikiri yusĩnikiaki, na hãtxarã

2 ¹Eska dukũkiri hatu yusĩkubaĩwẽ. Yurabu betsa betsapabu Deusũ hau hatu merabewakubainũ Deusbe hãtxakĩ hatu yukashũkĩ betsabukiri hatu ea ashũkĩ hãtxakĩ hatukiri Deus kẽwãkubaĩkãwẽ. ²Deusũ yusã pepa txibaĩ unãnuma benimai hiweshũ hawama pepa besti hawa dakeama nũ hiweyukubainũbũ shanẽ ibubu inũ yununikabu haska tibikiri hatu yukashũkubainãkãwẽ, hau Deusũ nukukiri hatu pe xinãmanunã. ³Haska nũ hatukiri xinãkĩ hatu yukashunairã, harã, peki, nukũ mekenika Deusũ haska abumisenã. ⁴Hatunã, hakiri hawẽ kakape txanima dasibĩbũ unãkĩ hau ikũwaĩ mekeshanũbũ Deusũ abuikiki. ⁵Haskawẽ taea eska Deus hawẽ xinã hayaki. Deusrã, bestitxaiki. Hanua nuku itsa habe hãtxashũmisrã, bestitxairiki, ha Jesus Cristorã, Deus nuku daewashuni hãtxashũmisrã. ⁶Cristo tsuabũra ikũwaĩbu Deusũ hatũ txakabu buashũshanaiwẽ taea Jesus Cristo hamebi mawakĩ habũ ikũwãshanaibu hatu mekeniki. Haskakẽ na habiatiã Deusũ yununi tsuabura hakiri txanibaũtirubuki.

⁷Haskawẽ taeshũ Deusũ ea katutã hawẽ kakape yuishunika ea wakĩ Jesus Cristõ kuxipaya ea watã judeubuma anu na yusã Jesus Cristokiri txanima ã ha ikũwaĩ ã txanikauanũ ea yununiki. Na haska mia yuikinã, txani txakakĩ ã mia yuiamaki.

Aĩbũ hatũ yura dauwamisbukiri hatu nemanikiaki, na hãtxarã

⁸Haska inũ, betsarã, hanishũra ikũwaĩbũ Deus kẽwãnũ ika itxa hunibu hau mexãtã Deusbe hãtxakubainũbũwẽ. Haskai Deusbe hãtxai haska bestiama haska Deusũ abuai benimawai besti hiwei hawa tsuki sinatama tsua ha akama hau pe besti meribi hiwekĩ hatu uĩmakubainũbũwẽ. ⁹Ha inũ, habiaskariai aĩbuaibũ ikũwaĩ mapuarã, hawẽruashũ hunibu kemumama inũ hatũ yuraki batxi hawẽ kemumati hatu xinãmakĩ hau saweyamanũbũwẽ. Bu txũpia inũ mane itxapa inũ batxi karuhaira haska bestiwe hau hawẽruayamakubainũbũwẽ. ¹⁰Hakia aĩbuaibũ Deus ikũwaĩ benimawakinã, haska abuai nishũ dayashũkĩ hatu merabewakĩ pepa besti aki hawẽ dauwa itsai hau duapakubainũbũwẽ. ¹¹Hanushũ Deusũ hãtxa yuiaibu anu buarã, hau pes bestishũ yusãaĩbu hau hatu nĩkakubainũbũwẽ. ¹²⁻¹⁴Ha dukũ damiwakĩ taewakinã, Adão Deusũ damiwaniki. Ha katxu hawẽ aĩ Eva damiwarianiki. Adão Satanásã paranũ, iwanã, yuiama hakia hawẽ aĩ Eva parãkĩ ha dukũ txakabuwamaniki. Haskawẽ taeshũ

shanē ibukĩ aĩbuaibũ yunutiruma inũ hunibu yusĩtirubuma ē hatu nemamiski, hau peshũ nĩka bestikubainũbunã. ¹⁵Hakia aĩbuaibũ Jesus Cristo ikũwaĩ pe hiwei betsabuwē nui duanamekĩ haska Deusũ abuai ashuĩ meribikĩ txibākubainaiburã, tsuãra bake bitã hatuwē nuikĩ pe yumewakubaĩmisburã, Deusũ ha aĩbuaibu mekekubaĩshanikiki.

Hatũ mekenikai uĩnikabuirã, eska itikiaki, na hãtxarã

3 ¹Na hãtxarã, txanima habiaskaki. Haratubũra Jesus Cristo ikũwaĩbu hatũ mekenikakatsis ikirã, daya pepa akatsi ikaiburã, haskarã, peki. ²Na eska yunua daya birã, hau eska tibi ikubainũbũwē. Duapa hakiri txakabu yuisbuma inũ, aĩyãkatsi ikĩ aĩbu bitã heneisma betsawē kemuisma inũ, hawē hãtxa kayabi binumakĩ kaneama pe xinãkĩ akubaĩmisbu inũ, haki kasheisbuma inũ, bai mapuabu hatu itã hatu ushãmisbu inũ, yusĩnanaĩ pekũkaĩmisbu itirubuki. ³Ha dikabi eska tibi meama xinãmisburã, paëakiri xinaĩsbuma inũ, detenamekatsi ikĩ xinaĩsbuma inũ, mabu inũ peiwē kemuisbuma inũ, duapakatsis iki pepamisbu itirubuki. ⁴Ha inũ, hawē hiwe anu hatube hiweabu hatu meke pewashũ hatu pimakĩ pewamisbu inũ hawē bakebu hau haska hiwenũbũ hatu yunua txibaĩ hawa txakabu mekĩ tsua bikawaisbuma itirubuki. ⁵Tsuãra habe hiweabu hatu meke pewaismatunã, ikũwaĩbu Deusũ enabu haska washũ hatu pe meketirubumariki. ⁶Ha inũ, mekenika katukĩ dama ikũwãkĩ taewabainai hawaira uĩtã katuyamakubaĩwē. Hamē dama ikũwaĩ mã haska katua: “Ea besti ē pehairaki”, iki keãyã Deusũ Satanás putani keska wakĩ haskari wakĩ hatu putariatiruki. ⁷Ha inũ, ikũwãbumã ha huni pepa hawē xinã unãtã hakiri pe xinãmisbu besti uĩkubaĩkĩ mekenika katutiki, Satanásã parãkĩ hatu atxia hawaira kanekĩ hau hatu uĩmatxakayamashanunã.

Merabewanikabu katukinã eskabu atikiaki, na hãtxarã

⁸Habiaskari wakĩ merabewanikabu katukinã, eskari akubaĩkãwē. Hunibũ hakiri pe xinaĩ haki kasheisbuma inũ, hawara yubaka bestitã kaneisbuma inũ, paeisbuma inũ, hatu beparãtã pei inũ hatũ mabu ibubis binumatã itxawaisbuma hau ikubainũbũwē. ⁹Ha inũ, Deusũ yununi hawē bakē kakape txanima unãhairai haskawē hiwekaĩkĩ ikũwaĩ hatũ xinã pepaya hau ikubainũbũwē. ¹⁰Ha dukũ hatũ hiwea pemëkaĩ ishũ uĩkubaĩkĩ hakiri hawa txakabu kaĩmabumakē unãtã merabewanika dayanika katutirubuki. ¹¹Habiaskari wakĩ aĩbuaiburi merabewanika katukatsis ikinã, hakiri pe xinaĩ haki kasheisbuma inũ, hatũ txani tuekĩ hatu nĩkamaisma inũ, patapai kasheisbuma inũ, dasibi hawē pepa hatu uĩmakubaĩmisrã, haska keskabu besti akubaĩkãwē, katukinã. ¹²Merabewanika hunirã, aĩbu bitã bake watã habetã yumewai habe putanameisbuma inũ, hawē hiwe anu hawē bakebu

inũ hatube hiweabu hatu meke pewashũ hatu pimakĩ pewamisbu hau haska ikubainũbũwẽ. ¹³Hanua merabewanikabu pepakĩ Jesus Cristo dayashũkinã, betsabu uĩmai hawa txakabuamakẽ habũ kẽwãtirubuki. Hanua Jesus Cristo ikũwaĩwẽ taea benimai unãnuma hiwekubaĩtirubuki.

Txanima hãtxa shabakabi ha ikũwaĩ eskatikikiaki, na hãtxarã

¹⁴Ë hawaira samama mia uĩ kakatsis ibiai haskabia ã mia keneshũyuaii. ¹⁵Ë yane katiruma xinãkinã, haskai Deus hiweatũ enabũ txanima hãtxa Jesus Cristokiri hatũ matu tsuma unãkĩ txanima hãtxa besti xinaĩ hawẽ nemakanã haskai hiwei hau mekei penũbũ haskakiri mĩ hatu yusĩnũ bebũkiri ã mia kene bumaii. ¹⁶Dasibi Jesus Cristo nũ ikũwaĩwẽ Deusũ nuku duawai nũ unã keyutirumabia txanima shabakabi haska wani haska xinaĩ tsuabura haskakiri yui nũ hawẽ ha itirubumaki. Hakia hawẽ bake ikũwãkĩ Deus nũ benimawatiruki. Eskaki, mia yuinũ nĩkawe:

Cristo huirã, hunĩ yura bitã tashniniki.

Cristorã, hawa txakabu hayama pepa bestiki, iwanã,
Deusũ Yushĩ Papatũ hawẽ hiweakiri yuiniki.

Bestẽkaina Deusũ nai tsumabũri uĩriakubainibuki.

Ha inũ, nawa betsa betsapa anushũ

Jesusũ tsumabũ kakape hakiri yusĩkubaunaibũ

itxapabũ ikũwaĩbũ Deusũ nai anu ana hawẽri ainitã
shanẽ ibu wani nũ unaiĩ.

Jesus Cristo ikũwaĩ betsabu txĩtũshanaibukiri yusĩakiaki, na hãtxarã

4 ¹Jesus Cristo ana hua kemaya haskai habũ ikũwaĩ betsabu txĩtuĩ bebũkiri haskanũbariaibukiri Deusũ Yushĩ Papatũ shabakabi nuku unãmai mia yuinũ nĩkawe. Habũ Jesus Cristo txibãkĩ henetã yushĩ txakabu parananaĩbu inũ Satanãsã tsumabũ hatũ yusĩa habu anua huai nĩkatã txibãshãkanikiki. ²Ha yurabu beparamenikabu inũ txanitxakanikabũ habu hawaki dakeisbuma habũ hatũ yusĩa txibãshãkanikiki. ³Ha hunibũ yusĩanã, aĩyaĩ inũ beneyatikiri inũ piti betsa tibikiri piaibu nemamisbuki. Hakia Deusũ piti xarabu damiwani tsuabũra habũ Cristo ikũwaĩbũ txanima unãkĩ Deus kẽwãtã pitirububiakẽ ha piti betsakiri hatu nemamisbu habũ mesewakĩ yusĩaĩbu nĩkakĩ txibãshãkanikiki. ⁴Hamapai piti xarabu Deusũ damiwatã: “Peki”, aniki. Haskawẽ taeshũ hawara Deusũ nuku inã bishũ pikinã, danãma kẽwãtã hau pikubainũbũwẽ. ⁵Haska piti tibi Deusũ hawẽ hãtxawẽ yuikĩ pewani xinãkĩ habe hãtxashũ nũ piarã, ma dasibi nuku pewashũkubaĩmiski.

⁶Na haska hãtxa kayabi ã mia yuiairã, nukũ betsabu inũ nukũ puibũ ikũwaĩbu habiaskari hatu yusĩkubaĩwẽ. Haskakĩ hawẽ ikũwãti hãtxa mĩ haya inũ yusĩa pepa mĩ txibaĩ ana hawẽ huĩti kuxipakũkaini Jesus Cristõ tsuma pepa mĩ ikũkaĩshanaii.

⁷Hakia habu patapaibu inũ ikũwãbumã miyui hawama yuiaibu nĩkai hatu anu naxui ikama ikũkaĩwẽ. Hamẽ mia ikirã, haska Deusũ mia hiwemakatsis ikai pepai mimebi mĩ xinãnẽ mekei yurabu uĩmai hiwekũkaĩwẽ. ⁸Hunĩ hawẽ yura kuxipa wai pebiakẽ Deus hiweakiri yubakani hãtxa unãkĩ txibãkĩ hawẽ huĩti kuxipa wairã, ha binua pehairaki, natiã nũ hiwea inũ txipu uatiã Deusbe nũ hiweshanai nũ manakairã. ⁹Ha hãtxa txanimaki, dasibibũ nĩkakĩ ikũwãtiruburã. ¹⁰Haskawẽ taea dayakĩ Deus hiweatũ yura betsa betsapabu merabewakatsis ibiaya tsuabũra hawẽ bake Jesus Cristo ikũwaĩbu besti hatu mekekubaĩshanaiwẽ taea nũ habe hiweshanai manakakĩ habias hawẽ hãtxa nũ yusiayã nuku itxakawabiabu hatu ikũwãmanũ ika nũ dayakũkainai.

¹¹Habiaskari ẽ mia yui ai yunukĩ hatu yusiũkubaĩwẽ. ¹²Mĩ berunã huni ewariamabatũ mĩ hatu yusiãĩ hau mia danãyamanũbũ pe bestikũkaĩwẽ. Ha inũ, mĩ hãtxa pe tashnimakĩ duapai hatuwẽ nuikĩ Jesus Cristõ yusiã ikũhairawakĩ mĩ ikũwai hatu uĩmawe, hau haskariakĩ yura betsã ikũwãtã hiweriakubainũbũ ikũwaĩbu hatu yusiũkubaĩwẽ. ¹³Nenua ẽ mia anu hikiriamakẽ nukũ betsabu inũ nukũ puibu Éfeso anushũ ikũwaĩbu itxabu Deusũ hãtxa hatu yuishiũkĩ benimawakĩ hatũ huĩti kuxipa wakĩ hatu pe besti yusiũkĩ heneyamawe. ¹⁴Ha inũ, mĩ mae anushũ Jesus Cristonabu mekenikabũ mia mamepishũ Deus mia yukashunabu hawẽ Yushi Pepa mia yunua mia kuxipa wanirã, unãnumas hamakiri hãtxama haska Deusũ mia merabewani hakiri besti hãtxai dayakũkaĩwẽ, kaneamarã.

¹⁵Haskai mimebi ana unãnepai xinã pepakũkaini dasibibũ hau mia uĩnũbũ daya betsa akama mĩ kuxipa hirabiwẽ hatu yusiũkubaĩwẽ. ¹⁶Mimebi pe mekekĩ uĩrawe, haska betsabu mĩ hatu yusiakirirã. Dasibi xinã pe bestiwai txitũyamakũkaĩwẽ. Mĩ haskakũkainaya mia inũ mĩ hãtxa habũ nikaibu hatube Deusũ pewẽ mia manakushanikiki, hiwe kayabimakinã.

Ikũwaĩbu betsa betsapakiri merabewakĩ xinãtikiaki, na hãtxarã

5 ¹Kaneaidu pewakĩ hatu ha ayamakubaĩwẽ. Hakia anibũ kaneaya mĩ epa keska wakĩ hatu merabewakĩ hãtxa kuxipawẽ hatu bekũyã akama hatu pewẽ xinãmakubaĩwẽ. Berunã inũ huni ewã kaneaya mĩ betsabu keska wakĩ merabewakĩ hatu pewakubaĩwẽ. ²Yushabũ kaneaya mĩ ewa keska wakĩ hatu merabewakĩ pewakubaĩwẽ. Txipax inũ aĩbu ewãri kaneaya mĩ puibu keska wakĩ merabewakĩ hatu pewakubaĩwẽ, hatuwẽ kemuamarã. Haska wakĩ dasibibu hatu merabewakubaĩwẽ.

³Aĩbu ewa beneyabiani ana bene hayabumã Jesus Cristo ikũwaĩbu txanima nuitapa kayabiaya hawenabu hayamakẽ Jesus Cristonabũ duawakĩ hau hatu merabewakubainũbũwẽ. ⁴Hakia beneyabiani nuitapaibu hatũ bakebu inũ hatũ bababu hayarã, habũ dukũ hau

hatu merabewakī hawē tapīkubainūbūwē, hatunabu kayabibunā. Haska hatunabu merabewakī hatuwē nuikinā, Deus benimawakī xinā txākāwātirubuki. ⁵Aību ewa beneyabianibū Jesus Cristo ikūwaī hawenabu hayama Deusū hau hatu merabewanū haska manakakī bariri inū mexu merā Deus kēwākī habe hātxakī hawē piti inū hawē mabukiri yukamibuki. ⁶Hakia aību ewa beneyabiani betsabū Deusū hātxa xināma patapakī hawara akatsi ikai amisburā, hiwebia hawē yushī ma mawaki. Haskawē taea Deus hatuki sinataikiki. ⁷Haskakē hau ikūwābumā hatukiri txakabu yuiyamanūbū ikūwaību yusīkī hau hatunabu merabewakubainūbū hatu yunukubaīwē, hatu xināmakinā. ⁸Haskakē tsuabūra hawenabuskiri xinākī hatuwē nuikī merabewama Jesus Cristo ikūwābiai danākanikiki. Hatunabuwē nuikī merabewamawē taeārā, habū ikūwābumā xinā betsa waisma keska habū ikūwābiai xinā hayama nuima txakabuki.

⁹Habū ikūwaī yushabu 60 bariya unuri kai beneyatā betsawē kemukī heneama ipauni enauma ikūwaībū merabewatirurā, eska atiki, hatu tanakīnā. ¹⁰Hatū bakebu ma pe yumewani inū, bai beaību hatū hiwetā itā Jesus Cristonabu betsabu duawakī beya wakī hatū tae hutxupaunību natiā hari nuitapaya merabewakī pe besti dayakūkainiwē taeshū Jesus Cristonabū ha pepabu besti hatukiri xinākī hau merabewakubainūbūwē. ¹¹Haska inū, aībuai bu beneyabia hawē benē heneima kasmai mawaimakē yushaburiamarā, hau ikūwaībū haska xarabu hau hatu tanatā merabewayamakubainūbūwē, Jesus Cristo dayashūkatsi yubakabaiama hakimatā huniwē kemui ana beneyakatsis itirubukirā. ¹²Hanua ana beneyama ikūwaību merabewai hatube dayakatsi yubakabaiama ibubis xinā betsatā ha yubakaima ana xināma kanei txakabuaya Deus hatuki sinatatiruki. ¹³Haska inū, yushaburiama hatū piti inū hatū mabu inākī mā hatu merabewaiwē taea haska besti bi ana dayakatsi ikama hiwe tibi anu besti hikikūkauni txikix pikutirubuki. Ha txikix pikuiamarā, haska bestiama hiwe betsa tibi anu tsaushū hatubetā txani yui inū betsabuki txanitxakakī haska txani yui beyatirubuki, haskai txakabui pikuirā. ¹⁴Ikūwābumā hau nukuki kasheyamanūbū aību beneyabaiama ma hawē bene mawa kasmai henebainima yushaburiabumarā, hau ana beneyakubainūbūwē. Haskatā bake bitā hatū hiwe meranua pe dayakī hau hatu duawakubainūbūwē. ¹⁵Uīwē. Hatiri aību yushaburiama beneyabiani ana beneumakē hatu merabewabiabu ana Jesus Cristo txibākatsi ikama Satanásā haska abuai txibaību uīkī eska ē mia yunuaii.

¹⁶Hanushū yushabu beneuma nuitapai enayakenā, hau hawenabū merabewakubainūbūwē, ikūwaībukiri xinākī hatu bika wamamarā. Hakia ikūwaību itxashū yushabu betsabu enauma besti merabewatirubuki, hatū piti inū hatū mabu hawa hayamakē hatukiri xinākinā.

17-18 Mekenikabukiri ana mia yuinū nīkawe. Moisés Deusū hātxa kenekī: “Mī hemaĩtī anushū mī ina awā hawē taewē mī shekiwā pema pema akī mia shemeshunaya dispiwē sheneshyamakāwē, hau dabukū pinunā”, iwanā, yununiki. Haska yuikinā: “Dayakapabu hau hatu pakakubainūbūwē”, ani keska wakī mekenikabu tibi habū matu yusīaiburā, haratura bestitū Deusū hātxa matu yusī henekatsi ikama matu yusīkī matu merabewakubainaibuwē taeshū matūri ha matū mekenika duawakī peiwē kasmai hawarawē merabewakī hawē hawara inākubaikāwē.

19 Haska inū, mekenikatū txakabu wakī kaneaikiri huni bestitxai miki txanikī hakiri mia yuiāi nīkayamayuwe. Hakia mekenikakiri habias txakabukiri dabe kasmai dabe inū bestitū mia yuiāibu: “Txanimēkaī? Txanimaraka?” ikī unāti watiki. 20 Hanushū txakabu wakubainaibu pewanū itā Deuski hatu datemakī dasibiburi hau daterianūbū itxashū nīkaibū pewakī hatu mesewakī shabakabi nemakubaīwē.

21 Natianā, Deus inū nukū Shanē Ibu Jesus Cristo inū hawē nai tsuma katuabū habū ea nīkaibū ē mia yunu kayabiai ea nīkawe. Mī haibuaibu kasmai yura betsabu tsuāra hamapai mekī txakabu waxinamēkaī, txakabu wamamēkaī, bebūkiri txakabu xināma dasibibu habias ma miki txaniaibū besti unāti watā hatu pe wakubaīwē. 22 Ha dikabi hau tsuāra Deusū daya ashunū katukatsis ikinā, hī hī, iwanā, uīriama mamepishū hawaira Deus yukashūyamawe. Hakia hawē txakabu unāriama kanekī mī hawaira katukē: “Hawē txakaburā, unāma ikimēkaī?”, iwanā, mikiri xinātirubuki. Haska huni betsā txakabu mī pewashūtirumarā, mimebi mekekī uīrakubaīwē.

23 Mī hatu babu mī isīkūkaīmiswē taeshū ana ūpash besti akama uva vinho hushkeixtatā akubaīwē, bari tibirā.

24 Haska inū, hatiri ikūwābiakī yurabū berubi txakabu wamisbuki. Betsabū hune txakabu wariamisbuki. Haskaibu hatu uībiamisbukē miā hawa unāma hawaira hatu katukī mamepiyamakubaīwē, txipu hatū txakabu tashnitirukirā. 25 Habiaskari wakī merabenākī pepawaibu bebūkiri unāmisbuki. Hakia betsabū txakabuwakī hune abiaya atimas tapīriamisbuki.

6 1 Hamē betsarā, tsuara huni betsā escravo dayarutunā, Jesus Cristo ikūwākī hau hatū tsuma duawakī nīkai hau hatukiri pe xinākubainūbūwē, hatu heneamarā. Hatu haska uīmamakē Jesus Cristokiri nū hatu yusīaī inū Deusū kena yura betsabū yuātirubuki, “Hanis hatu yusīkaniraka”, nuku wamakinā. 2 Ha inū, hatū tsumapā Jesus Cristo ikūwāyā habetā ikūwāriairā, hawē betsa keskai hau haki mesekubainūbūwē. Uatiā imisbu keskama hau dayai peshūkī hatu binumakubainūbūwē, hatū tsumapā hatu dayashūbiamisbu habetā ikūwaīnā, betsa nuikipa keskaya hau haki txiti ikubainūbūwē.

Hawara nū hayawē besti benimakūkaiiki, na hātcharā

Na haska tibi yusīkī hatu tapīmakubaīwē. ³Tsuāra hatu yusīkatsis ikī hatū xinā betsahaira itimaskakiri haska hatu yusīanā, nukū Shanē Ibu Jesus Cristō nuku yusīni keskama inū haska hakiri xinākī nū hatu yusīmis keskama hatū xinānē besti kēkī yusīkatsis ikanikiki. ⁴Hawē taea besti keī unāmabia ha iki haskakiri xinaī hamebi hatū xinā hatu atimapa wamamisbuki. Eska tibi hatū xinā meranua tashnirā, hawara betsana ha hawena haska hayama uī haskai ha besti haska hayamē iki sinatairā, yuānanaī betsabube danānanaīnā, abunameama sheti ikama hatuki ha ikirā, ⁵yura betsa betsapabube hatū yusīa hātcha kayabi unābumabe kenamei heneisma inū haska ikūwākī yusīaīwē taeshū pei itxapa bitikiri xinākanikiki. Hatu uīrakubaīwē. ⁶Haskakiri nukubū nū hariri xinākī ikūwaīburā, txanima kayabiki. Deusū hawē pepa tibi mabu keyumis keskama nuku inaī inū nuku ināshanaiwē taea nū benimahairakūkainai. Haskakē natiā haska nū haya bestiwē benimayunākāwē. ⁷Na mai anu tashnirā, nū hawauma kaīniki. Hanua mawakaīkī nū hawa buama iriashanai. ⁸Haskawē taea Deus nū ikūwaīburā, tari inū piti inū hanu ushati haya ha besti nū hayarā, haskawē besti benimakubainākāwē. ⁹Hakia tsuabura mabu inū pei bestiwē kemuaīburā, habū hawa unāmawē tearā, birū tibi keska hatū kemu pae tibiwē hatu atxi keyua haska tibi tashniaiwē taea hawa xināma: “Ē peaii”, i bestikī hamapai txakabu hawērua besti abui hawē hiwe txakai pikukūkaini hawē hiwea benui hanu kupiaitiā hawa pepa biamā benushākanikiki. ¹⁰Pei inū maburā, hatū kemuti pae txakabū hatu atxia hanu hayaki. Haska mabu inū peiwē kemui Jesus Cristo ikūwaību bestibu has besti dayanū ika haska abuai hatū xinā pe hetetā ana Jesus Cristo ikūwaī xināma ma hakimawē taea hanua hakiri hawē txakabu betsa betsapa tashnibirākī hatu nuitapawamiski.

Jesus Cristo txibākī hau pe besti yusīkubainū

Paulō Timóteo yununikiaki, na hātcharā

¹¹Hakia miarā, Deusū ma mia hawena wakī katuniwē taeshū hawara txakabu betsa betsapa betxitā danaī ana hari kayamawe. Mī pe dayai hiwekatsi ikairā, mī daya bikabiakē Deusū mia unaīwē taea ikūwaī nui abunamei kuxipai huīti kuxiama babutā hatu uīmai hatube hiwekūkaiwē. ¹²Haska mī hiwea ikibi ika bibiatā mī benutiruma Deusū mia inākatsi mia kenakī katuniwē taeshū haska mī ikūwaī mī ma itxabu anua shabakabi txanini hatu unāmakubaīwē, Jesus Cristo txibaī txītuāma dasibi Deusū mia yunumis dateama xinākī akubaīkinā. ¹³Deusū dasibi damiwakī hiwea hatu inākī keyumis inū nukū Shanē Ibu Jesus Cristō haska shabakabi huni dateama Romano shanē ibu Pōncio Pilatoski

txanikĩ ma yuinitũ natiã nuku uĩaĩbũ mia merabewakĩ ẽ mia yunuaii. ¹⁴Na haska tibi ẽ mia yunuai haska txibãkĩ mĩ hiwea pe mekeshũ kaneama mikiri pe hatu uĩmairakubaĩwẽ, hanu nukũ Shanẽ Ibu Jesus Cristo kuxipai huaitiã hau mikiri hawa txakabu tsuã yuiyamashanunã. ¹⁵Hanushũ Deus dasibi binu keyuatũ hatũ besti pepa meke keyua hatũ yununika shanẽ ibubu dasibi inũ shanẽ ibu beshmasbu dasibiri binu keyuatũ hanu nukũ Shanẽ Ibu ana nuku anu tashnimakatsis ikĩ ma hanu yubakani meneaya nitxĩshanikiki. ¹⁶Ha ibubis mawatiruma inũ, ha besti hiwemis shaba txashakapa hiweaki tsua hari haki kematirumarã, tsuã uĩtiruma inũ tsuã uĩnakama hiweaki. Haskakẽ hawẽ kuxipa pae nukaisma duawakĩ hau kẽwãpakenũbũwẽ, niti ikamarã. Haskakirã.

¹⁷Tsuãra ikũwaĩ hawẽ pei inũ hawẽ mabu itxapa hayabũ xinaĩ: “Natiã ẽ mabu ẽ hayawẽ ẽ hawẽ hiwei peakĩ”, ikĩ hau ana haskakiri xinaĩ hawẽ kẽyamanũbũ hatu yuiwe. Ha haskakiri xinãmisburã, hatũ mabu txapumiswẽ hatu mestẽwãtã hiwematirumaki. Haskakẽ uatiã imisbu haska xinãma hakia natianã, Deusũ nuku benimawakĩ hatũ hamapai betsa betsapa yauxiama nuku inãkubaĩmis haska besti bi hau hiwekubainũbũwẽ. ¹⁸Haska inũ, hatũ hamapai mabu haya betsaburi pashkashũti xinãkĩ haska Deusũ abuai aki hau pepakubainũbũ hatu yunuriawe. ¹⁹Haska wakubaĩmiswẽ taeshũ Deus hatuwẽ benimakĩ hatũ duapa pepawẽ bari hawẽ heneaitiã Deusũ hatu manakushanaĩ txanima hiwekuĩa kayabi bi haki nukunũbarikanikiki.

²⁰⁻²¹Timóteoõ, mĩ xinã mekeirawe, haska Jesus Cristoki mĩ txiti ikawẽ taearã. Haskai betsabu tatimai unãnepanũ ika kenamei ana Jesus Cristo ikũwãma hatũ xinã meribi watã ma txĩtuãbuki. Haskakẽ mianã, ha hãtxatxakaiburã, hatũ yusĩa txakabuwẽ parananaĩ: “Nukũ hãtxa unãnepati kayabiki”, ikĩ yusĩa pepa beshtenũ ikaibu hamẽ hatu nĩkayamakubaĩwẽ.

Nukũ Shanẽ Ibũ hau hatube mia duawakubainũwẽ.

Hatiski, ẽ hãtxarã.

Paulo